

**Le document ci-après, rédigé en Kinyarwanda, fait état des résolutions du 3<sup>ème</sup> congrès du Parti Social Démocrate (PSD) tenu à Kigali du 8 au 9 octobre 2005.**

**IMYANZURO YA KONGERE YA GATATU Y'ISHYAKA RIHARANIRA DEMOKARASI N'IMIBEREHO MYIZA Y'ABATURAGE (P.S.D) YATERANIYE I KIGALI KU MATARIKI YA 8 N'IYA 9 UKWAKIRA 2005.**

Kongere ya Gatatu isanzwe mu rwego rw'Igihugu y'Ishyaka Riharanira Demokarasi n'Imibereho Myiza y'Abaturage, PSD, yateraniye i Kigali ku matariki ya **8 n'ya 9 Ukwakira 2005** ifata imyanzuro ikurikira:

**Mu rwego rwa Politiki na Demokarasi:**

- Kongere ya Gatatu y'Ishyaka yongeye gushimangira amahame-remezo yaryo ashingiye cyane cyane k'**Ubutabera, Ubwisungane, Amajyambere** no gushimangira **Demokarasi**.
- Kongere ya Gatatu y'Ishyaka ishyigikiye imikoranire myiza n'indi mitwe ya politiki mu gushakira Abanyarwanda amahoro n'imibereho myiza.
- Kongere ya Gatatu y'Ishyaka yamaganye ingengabitekerezo ya jenocide n'ibindi bitekerezo bitanya Abanyarwanda.
- Kongere ya Gatatu y'Ishyaka ishyigikiye ivugurura ry'ubutegetsu ritegurwa muri iki gihe mu rwego rwa gahunda isanzwe yo kwegereza abaturage ubuyobozi n'ubushobozi.
- Muri uko kwegereza ubuyobozi abaturage, Kongere ya Gatatu y'Ishyaka ishyigikiye kwegereza inzego z'ishyaka abaturage rigakorera mu Ntara, Akarere n'Umurenge;
- Kongere ya Gatatu y'Ishyaka ishyigikiye ko ubwumvikane n'imishyikirano biba hagati y'imitwe ya politiki mu nzego nkuru z'Igihugu yagaragarira no mu zindi nzego z'ubuyobozi.
- Kongere ya Gatatu ishyigikiye ko Itegeko rigenga imitwe ya politiki ryavugururwa, inkunga imitwe ya politiki yemererwa n'Itegeko-Nshinga ikajya iteganywa mu ngengo y'imari y'Igihugu ya buri mwaka kandi igatangirwa igihe.
- Kongere ya Gatatu y'Ishyaka irasaba ko abayobozi b'inzego z'ibanze bahabwa amahugurwa ku birebana na demokarasi ishingiyeye ku mitwe ya politiki myinshi kugirango imikoranire hagati y'imitwe ya politiki irushaho kuba myiza.
- Kongere ya Gatatu y'Ishyaka irasaba Komite Nyobozi kujya igira icyo itangariza Abanyarwanda ku bibazo bikomeye by'Igihugu igihe cyose bibonetse kandi vuba.
- Kongere ya Gatatu y'Ishyaka irasaba ko habaho amahugurwa y'abarwanashyaka ku byerekeye amahame-remezo ya P.S.D. na demokarasi no gushyiraho ikinyamakuru cy'ishyaka zimwe muri izo nyigisho zanyuzwamo.
- Kongere ya Gatatu y'Ishyaka irasaba kuvugurura Komisiyo y'Igihugu y'Amatora ku buryo imitwe ya politiki yose yemewe yahagararirwa muri icyo Komisiyo ku rwego rw'Intara, Uturere n'Imirenge.

### **Mu rwego rw'ubukungu n'imibereho myiza y'abaturage:**

- Ku kibazo cy'ibiciro, Kongere ya Gatatu y'Ishyaka ishyigikiye ko imishahara y'abakozi yahuzwa n'imizamukire y'ibiciro by'ibikenerwa by'ibanze.
- Kongere ya Gatatu ishyigikiye gushishikariza abarwanashyaka n'abanyarwanda muri rusange kwitabira kujya mu mashyirahamwe yagira uruhare mu kubateza imbere.
- Kongere ya Gatatu y'Ishyaka ishyigikiye ko "mutuelles de santé" zavugururwa, umuntu agashobora kwivuriza aho indwara imufatiye no gushobora kwivuza indwara zose zivurizwa mu bigo nderabuzima n'ibitaro.
- Kongere ya Gatatu y'Ishyaka ishyigikiye ko hajyaho ishoramari ry'umwihariko mu buhinzi n'ubworozi ryafasha kuzamura imibereho myiza y'abanyarwanda.
- Kongere ya Gatatu y'Ishyaka ishyigikiye ko imidugudu yakwira hose mu gihugu kugira ngo ubutaka buhingwa bwiyongere kandi ibikorwa-remezo bishobore kugera ku baturage.
- Kongere ya Gatatu y'Ishyaka ishyigikiye ko Leta yashyira ingufu zihagije mu gukemura ikibazo cy'amazi, amashanyarazi n'ingufu muri rusange.

### **Mu rwego rw'uburezi:**

- Kongere ya Gatatu y'Ishyaka ishyigikiye ko umwarimu yahabwa umushahara wisumbuye kandi agahabwa agaciro akwiye.
- Kongere ya Gatatu y'Ishyaka ishyigikiye ko hashyirwaho ikigega cy'uburezi kuri buri murenge.

### **Inyandiko za PSD na Raporo ya Komite Nyobozi:**

Kongere ya Gatatu y'Ishyaka yemeje inyandiko z'Ishyaka zikurikira imaze kuzikosora no kuzuzura:

- Amahame n'Imigambi-Shingiro ya P.S.D.;
- Itegeko-Shingiro rya P.S.D.;
- Itegeko Ngengamikorere rya P.S.D.;
- Raporo ya Komite Nyobozi.

### **Inzego z'Ishyaka:**

Kongere ya Gatatu yatoye abagize Komite Nyobozi bakurikira:

- Perezida: **Dr BIRUTA Vincent**;
- Visi-Perezida wa Mbere: **RUGENERA Marc**;
- Visi-Perezida wa Kabiri: **Dr LYAMBABAJE Alexandre**;
- Umunyamabanga Mukuru: **Dr NTAWUKURIRYAYO Jean-Damascène**;

- Umunyamabanga Mukuru Wungirije ushinzwe ubwuzuzanye bw'abagore n'abagabo: **MUKAKANYAMUGENGE Jacqueline;**
- Umunyamabanga Mukuru Wungirije ushinzwe urubyiruko: **NYANSHWA Justin;**
- Umubitsi Mukuru: **Hon. KANTARAMA Pénélope.**

**Parti Social Démocrate (P.S.D.)**

Lycée de Kigali, ku ya 9 Ukwakira 2005